
SIARAN MEDIA
6 OGOS 2024**ECoS dan ST Menandatangani MoU untuk Mengukuhkan Kerjasama Tenaga**

PUTRAJAYA, 26 Ogos - Energy Commission of Sabah (ECoS) dan Suruhanjaya Tenaga Malaysia (ST) telah menandatangani Memorandum Persefahaman (MoU) untuk meningkatkan kerjasama dalam sektor tenaga.

Majlis penandatanganan MoU tersebut telah disaksikan oleh Dato Sri Haji Fadillah Haji Yusof, Timbalan Perdana Menteri merangkap Menteri Peralihan Tenaga dan Daya Guna Awam Malaysia bertujuan untuk mewujudkan kerangka pengiktirafan dua hala Perakuan Kekompetenan serta label keselamatan dan penarafan kecekapan tenaga bagi peralatan elektrik dan gas, yang dikeluarkan oleh ECoS dan ST.

MoU tersebut menggariskan beberapa bidang kerjasama utama, termasuk hal-hal yang berkaitan dengan Perakuan Kekompetenan ST.

Sejak ECoS mengambil alih kuasa kawalselia aktiviti bekalan gas dan elektrik dari ST masing-masing pada 10 Januari 2023 dan 3 Januari 2024, semua pemegang Perakuan Kekompetenan ST sedia ada akan diberikan tempoh masa sehingga 2 Januari 2025 bagi memperolehi kelayakan melalui proses yang sewajarnya untuk memohon Perakuan Kekompetenan yang setara dari ECoS.

Pemegang Perakuan Kekompetenan ST yang sedia ada mesti menghadiri dan lulus Kursus Enakmen Bekalan Gas 2023 dan Peraturan-Peraturan Bekalan Gas 2023 (bagi pemegang Perakuan Kekompetenan Gas ST) dan Kursus Enakmen Bekalan Elektrik 2024 dan Peraturan-Peraturan Bekalan Elektrik 2024 (bagi pemegang Perakuan Kekompetenan Elektrik ST) untuk layak menerima Perakuan Kekompetenan ECoS yang setara.

MoU tersebut juga menyatakan pengiktirafan dua hala bagi Label Keselamatan dan Label Penarafan Kecekapan Tenaga untuk memastikan kualiti standard bagi peralatan gas dan elektrik dalam menjamin kualiti dan keselamatan di kalangan pengguna.

"Kerjasama strategik ini bertujuan untuk menyelaraskan proses, meningkatkan keberkesanan, dan memastikan pendekatan yang selaras dalam mengawalselia sektor tenaga di Sabah, Semenanjung Malaysia, dan Wilayah Persekutuan Labuan. Melalui kerjasama bersama dengan ST, ECoS berharap dapat mewujudkan landskap tenaga yang lebih kompetitif dan mampan untuk kepentingan semua pihak berkepentingan," kata Datuk Abdul Nasser Abdul Wahid, Ketua Pegawai Eksekutif ECoS.

[tamat]

Mengenai ECoS

Suruhanjaya Tenaga Sabah (ECoS) adalah badan berkanun yang ditubuhkan oleh Kerajaan Negeri Sabah sejak 10 Januari 2023. Ia berfungsi sebagai pengawal selia untuk sektor tenaga dalam portfolio Ketua Menteri. Objektif utama ECoS adalah untuk memastikan tenaga yang selamat, mampan, mampu milik, dan mudah diakses untuk Negeri Sabah. ECoS memainkan peranan penting dalam membentuk landskap tenaga Sabah, menggalakkan amalan tenaga yang bertanggungjawab, dan melindungi kepentingan pengguna serta alam sekitar.